

تنظیمات ، سبیلری و نتیجه لری

عبدالمجیدک جلوسنی متعاقب لوندره دن عودت ایتمش اولان و بر قاچ دفعه کنج پادشاه ایله اوزون اوزادی یه ملاقاتلرده بولنان خارجیه ناظری مصطفی رشید پاشا کرک مصر مسئله سنک حلنی تأمین ایده بیلیمک، کرک بوندن بویله ده تکرر و تجددی شبهه سز اولان غائله لره قارشی کله بیلیمک ایچون آوروپا دولترینک و افکار عمومی سنک ممکن مرتبه مظاهرتنی قازانمق ایجاب ایده جکنی، بونک ایچون سیاسی و اداری اصلاحات یاپیلیمسی، غرب حکومتلرنک قانون و نظاملرنک قبول ایدلمسی و بو صورتله آوروپا دولتری آراسنده عثمانلی دولتنک بر موقع طوتارق یاشامغه حقی و لیاقتی بولندیغنک اونلره تسلیم ایتدیرلمسی لازم کله جکنی، بناء علیه آرتق قرون وسطائی اصول و قانونلره نهایت ویرلمسی اقتضا ایلدیکی پادشاهه ایضاح ایله کندیسنی اقناع ایلیه بیلدی. ایشته بو تأثیر آلتنده پادشاه، مسوده سی بالذات رشید پاشا قلمیله یازیلان (تنظیمات خیرییه) فرماننی قبول ایتدی. کلخانه میداننده فوق العاده مراسمله و اجنبی سفیرلری ده دعوت ایدلمش بولندوغی حالده بویوک بر جماعت حضوریله رشید پاشا طرفندن اوقونان بو فرمان تاریخندن اعتباراً آرتق آوروپاده کی دولت سیسته منه دوغرو آدیم آتیلیمغه باشلانمشدر (۱۸۳۹).

فرمانده غرب حکومتلرنک اصول و قوانینی قبول ایدیله جکنک آچیقندن آچیغه قیدینه جسارت ایدیله مدیکی جهتله، حکومتک یوز اللی سنه دنبری دوشدیکی ضعف و فقرک قوانین شرعیه یه رعایتسزلک یوزندن حاصل اولدوغی مقدمه سیله سوزه کیریشیله رک امنیت شخصییه، محفوظیت عرض و ناموس و مال، تعیین ویرکو و اخذ عساکر مسائلی کبی اساسلی ماده لره دائر ایجاب ایدن قانونلرک پیدرپی وضع و تأسیسی لازم و مهم کوروندیکی ذکر ایدلمش بولونیوردی، بوندن ماعدا آرتق بر محکمه حکمی بولونمدقجه هیچ کیمسه حقنده کیزلی و آشکار بر صورتده اعدام و تسمیم معامله سی اجرا ایدیلیمه جکی، هر کسک اموالنه تام بر سربستی ایله متصرف اوله رق هیچ بر وجهله مداخله ایدیلیمه جکی، جرائم اربابنک بیله ماللری مصادره ایدلمیوب ورته سنه ترک اولوناجغی، تکمیل بو مساعداته اهل اسلام و ملل سائره نک بلا استثنا مظهر اولاجقلمی تأمین ایدیلیور، کرک بو خصوصات ایچون و کرک تنظیمات عسکریه ایچون لازم کلن قانونلرک مجالس عائده

سی طرفدن همان وضع و تنظیمه باشلانمسی امر اولونیوردی، نهایت بوتون بو قانونره
تمامیله رعایت ایدلمک اوزره هم پادشاهک هم ده علما و وکلانک یمین ایده جکی علاوه
اولونمش، خلافه حرکت ایدنلر حقنده هیچ رتبه یه و خاطر و کوکله باقیمیه رق جزا تعیین
ایدلمک اوزره برده جزا قانوننامه سی تنظیمی خصوصی قید اولوندقدن صوکره بو صورتله
«اصول عتیقه نک بوتون بوتون تغییر و تجدید» ایدلمش اوله جعی ذکر اولونمق صورتیله
وضع و تنظیمی ایسته نیلن قانونلرک شرعی قانونلر اولمادیغی احساس ایدلمشدی. دقت
ایدیلرسه فرمانده کی صوکره سوزلرک ایلک سوزلری نقض ایدلیکی و یکی قانونلرک
اسکی زمانه و اصوله عودت دیمک اولمادیغی و فقط بو جهتک آچیقدن آچیغه اعترافه
جسارت ایدلمیه رک احکام شرعیه دن بحث ایدلمک صورتیله متعصب و محافظه کارلره
خوش کورونمک آرزو ایدلدیکی سهولته آکلاشیلیر.

تنظیماتک نتیجه؛ سیاسی، اجتماعی، اقتصادی و مالی اولمق اوزره بر قاچ قسمه
آیریلایلیر: اولاً مصر مسئله سنک حلنه یار دیم ایتدیکی کبی قریم محاربه سنده ده
آروپانک مظاهرتنی جلب خصوصنده مهم بر تأثیری اولدی. دولتده تشکیلات داخلیه سی
اعتباریله آز چوق قرون و سطا ئی شکلندن چیه رق نیم عصری اولدی: حاکمیت ملیه
اساسی قبول ایدلمش دکلسه ده فرانسز انقلابنک اساسلرندن بعضلری پادشاه طرفدن یمین
ایله تأیید اولونه رق ویرلمش بولوندی. قانونلرن تنظیم و مذاکره سی و لو منصوب مأ
مورلردن مرکب بعض مجلسلره حواله ایدلدی. حکومت دوائری آروپائی بر شکلده تنسیق
و تنظیم اولونمغه باشلادی. بر طرفدن احکام فقهیه یه استناداً بر مجله فقط دیکر طرفدن
آروپا قانونلرینک اساسلری داخلنده اداری، عسکری، جزائی و تجاری بر طاقم قانونلر
وجوده کتیرلدی. اسکی مدرسه لر یاننده غرب اصولنده مکتبلر آچیلیمغه باشلادی.

ثانیاً مسلملر ایله آراسنده کیتدکجه ده واسع بر مساوات حقوق تأسس ایتدی؛ کیمی
شرق معارفی ایله یتیشمش کیمی ده آروپائی تحصیل کورمش غیر مسلم مختلف
عناصردن مرکب قوتلی بر مأمورین صنفی وجوده کلدی. قیافت، معیشت، عادات مختلط بر
شکل آلدی. غیر مسلم جماعتلره حقوقی یکی وضعیتلر تأمین اولوندی.

ثالثاً مملکت اجنبیلرله غیر مسلملرک اقتصادی فعالیتنه ده مساعد بر شکله کیردیکی
ایچون تجارت ده واسع مقیاسده اولرک النه کچمکه باشلادی. دولت خارجدن استقراضلر

عقدینه قویولدی. کرک بو شکلده کرک خصوصی تشبثلر نتیجه سنده مملکت اجنبی سرمایه سی کیردی. فقط بو سرمایه لر مملکت ایچون متمر بر طرزده استعمال اولونه مادی. بالعکس اجنبی تحکمنه وسیله تشکیل ایتدی؛ اوتته دن بری تجارت و صنایعله مشغول اولان غیر مسلملر دها بویوک ثروتلر ایدنمکه موفق اولدیلر.

کورولیورکه تنظیمات هیأت عمومیه سیله غربه دوغرو بر آدیمدر. فقط بو آدییم مملکتی آوروپا مدنیتنه تماماً ایصال ایده مه مشدر. چونکه بو حرکت دها زیاده سیاسی ملاحظات ایله و شرق مدنیتک مؤسساتی فدا ایدیلیمیه رک اکثریتله تردد ایچنده اداره ایدلمشدر. بوندن باشقه مختلف اجنبی نفوذ و تأثیرلری قوتلنمش، عثمانلی مملکتک استثماری توسع ایتمش، غیر مسلم جماعتلرده سیاسی امللر پیشنده قوشه جق بر حاله کلمشدر.